

# ጳውሎስ ፊልጲሲዮሳ አሳስ ፃፊ ዓይነት ጋሳ ቆፋ

ጳውሎስ ፊልጲሲዮሳ አሳስ ፃፊ ዓይነት ዓይነት ሆኖ ሮሜ ቢታን ማቆይኒያ አውራጃን፣ ፊልጲሲዮሳ ቢታን ደዲያ ምሳ ኬሳሳ። ሄ ምሳ ኬሳይ ጳውሎስ አውሮፓ ቢታን ኮይሮ ኤሲዳ ምሳ ኬሳ። ሃ ከታይ ዓይነት ጳውሎስ ቃሾ ኬሳን ደዲያ ምዴ ሃራ አማኒያ አሳንኾቲ ኢያ ኢዲዳ ምዴኔ ፊልጲሲዮሳ ምሳ ኬሳን ደንዲዳ ምርዶ ቲሚርቲያ ጋሶን ኢያ ምዛይ ዳሮ አዛኒዳ ምዴ። ጊዶሺን፣ ጳውሎስ ዩሱስ ኪሪስቶሳ ሚንሲዲ አማኒያ ጊሾ ሃ ከታን ቆንጨዲ ቤንቴይ፣ ኡፋይሲኔ ኩሜሳ አማኔቴላ። ፊልጲሲዮሳን ደዲያ ዳሮ አሳይ ሮሜፕ ዲዌቲዲ ዩዳ አሲ። ኤንቲ ሮሜ ቢታስ ሚሼቶሶናኔ ሎይላ ናጎሶና። ኤንታፊ ኢሶቲ ኢሶቲ አማኒዲ ባንታ ቢታ አሳን ጎዴቲዶሶና። ሄ ጎዳይ ኤንታ ቦላ ሜቶኔ ማንቆቴላ ኤሂስ (ሃ.አ 16:20-21)።

ጳውሎስ ሃ ከታ ፃፊ ዓይነት ኮይሮ ጋሶይ ኢያ ሜቱዋ ምዴ ኢያ ማዳናው ፊልጲሲዮሳ አማኒያ አሳይ ኢሞታ ኢያው ዩዲዳ ጊሾ ኤንታ ጋላታናሳ። ኢያ ቦላኔ ኤንታ ቦላ ዱማ ዱማ ሜቶይ ጋኪዳባ ጊዲኮካ ኤንቲ ሚኔታና ሜላኔ ኩሜላ አማኔቲዲ ዳና ሜላ ሃ ደሚዳ ኢንጂያን ኤንታ ሚንሴሴስ። ጨቆኔ አቶሮ አጊዲ፣ ዩሱስ ኪሪስቶሳ አሽኬቴሳን ኤንቲ ኩማና ሜላ ሚንሲዲ ኤንታ አኬኪሴስ። ዩሱስ ኪሪስቶሳራ ኢሲፊ ጊዶን ኤንቲ ደሚዳ ደዳይ ምሳ አጵ ኬሃቴሳፊ ፑልቲዳይሳኔ አማኖን ኤንቲ ኤኪዳይሳፊ አቲን አይሁዴታ ምጋ ፖሎን ቤንቴዳባ ጊዶናይሳ ኤንታ አኬኪሴስ። ዩሱስ ኪሪስቶሳራ ኢሲፊ ደዲያ ኡባስ ምሳይ ኢሚያ ጎሩዋኔ ኡፋይሳ ኤንታው ፃፊስ።

ሃ ከታይ ኤሬቴይ ኡፋይሲ፣ አማኔቴላ፣ ኢሲፊቴላኔ አማኖን ሚኒዲ ደዳ ቆንጨሲዲ ቤሴይሳና። ሄሳ ቦላ ፕጂዲ፣ ጳውሎስ ፊልጲሲዮሳ ምሳ ኬሳ ሲቂያ ጊታ ሲቁዋ ቆንጨሴስ። ፊልጲሲዮሳ ከታ አይፊ ቆፋታ

- ጌሎ ቆፋ 1:1-11
- ጳውሎስ ሃኒዲ ደዲያ ዱሳ 1:12-26
- አማኖን ሌሚሶ ደዳ 1:27-2:18
- ፂሞቲዮሳሲኔ ኤጳፊራዲቱስ ደዲያ ቆፋ 2:19-30
- ሞርኬታፔኔ ኢታታፕ ናጌቴላ 3:1-4:9
- ጳውሎሳኔ ፊልጲሲዮሳ አማኒያ አሳ 4:10-20

ሳሮሶኔ አንጆ 4:21-23

1 ኪሪስቶስ ዩሱሳራ ኢሲሬዳ ጊሾ ያሳባ ጊዲዳ፥ ፊልጲሲዩሳ ካታማን ዴዲያ ዎሳ ኬሳ ጨማታሲኔ ዳቆኔታ ኡባስ። ዩሱስ ኪሪስቶሳ አይሌ ጊዲዳ፥ ጳጳሎሳፕቴኔ ሂሞቲዮሳፕ ኪቴቲዳ ኪታ።

2 ኑ አዋ ያሳፊኔ ጎዳ ዩሱስ ኪሪስቶሳፕ አዶ ኬሃቴሳይኔ ሳሮቴሳይ ሂንቴው ጊዶ።

ጳጳሎሳ ጋላታ ዎሳ

3 ታኒ ሂንቴና ቆፒያ ዎዴ ኡባን፥ ታ ያሳ ጋላታይስ። 4 ታኒ ሂንቴ ኡባስ ያሳ ዎሲያ ዎዴ ኡፋይሳን ዎሳይስ። 5 ሂንቴ ኮይሮ ጋላሳፕ ሃዲ ጋካናው፥ ዎንጌላ ማርካቴይሳን ታራ ኢሲሬ ጊዲዲ፥ ታና ማዲዳ ጊሾ ያሳ ጋላታይስ። 6 ሂንቴ ጊዶን ሎዎ አሶ ዶሚዳ ያሳይ፥ ኪሪስቶስ ዩሱሲ ሲሚያ ጋላሳይ ጋካናው፥ ፖላናይሳ ኤራይስ።

7 ሂንቴ ኡባ ዎዴ ታ ዎዛናን ዴዴታ። ታኒ ኡባ ዎዴካ ሄሳዳ ቆፓናው ቤሴስ። ሃዲ ታኒ ቃሾን ዴዳሼኔ ቃሼታናፕ ሲንሴ ዎንጌላ ናጎኔኔ ዎንጌላ ሚንሳ ኤሶን ያሳይ ታው ቃዲዳ ቃዳ ሂንቴካ ታራ ሻኬቲዴታ። 8 ታኒ ሂንቴና ኡባ ኪሪስቶስ ዩሱሳ ሲቁዎን አይ ሜላ ላሞቲያኮ ያሳይ ታው ማርካ።

9 ሂንቴ ሲቆይ ቱማ ኤራቴሳራኔ አኬካራ ኢሲሬ ጉጂ ጉጂ ዲጫና ሜላ ያሳ ዎሳይስ። 10 ሄሳን ሂንቴ ሎዎባ ሻኪዲ፥ ዶሬይሳታ፥ ኪሪስቶሲ ሲሚያ ጋላሳን ጌሻታኔ ቦሬቶናይሳታ ጊዳና። 11 ሂንቴ ዴዎይ ያሳ ቦንቹዎሲኔ ጋላታስ ዩሱስ ኪሪስቶሳ ባጋራ ቤንቴያ ሂሎቴሳ አይፊያን ኩሚዲ አይፋና።

ጳጳሎሳ ቃሼቴሳይ ዎንጌላይ ዳልጋና ሜላ ማዲስ

12 ታ ኢሻቶ፥ ታና ጋኪዳ ኡባይ ዎንጌላይ ዳልጋና ሜላ ቱማ ማዲዳይሳ ሂንቴ ኤራና ሜላ ኮያይስ። 13 ታኒ ኪሪስቶሳ ጊሾ ቃሼቴዳይሳ፥ ካዎ ኬሳ ናጌይሳቲኔ ሃይሳን ዴዲያ ሃራቲ ኡባይ ኤሮሶና። 14 ታ ቃሹዎ ጋሶን ኑ ኢሻታፕ ዳሮቲ ጎዳን ኬሂ አማኔቲዶሶና። ሄሳ ጊሾ፥ ያሳ ቃላ ያሺ ባይና ካሴይሳፊ አዲ ሚኒዲ አዳና ሜላ ሚኖቴሲ ዴሚዶሶና።

15 ጊዶሺን፥ ኢሶቲ ኢሶቲ ቃናቴኔኔ ፓላማን ኪሪስቶሳባ አዶሶና፥ ሺን ሃራቲ ሱሬ ዎዛናፕ አዶሶና። 16 ሱሬ ዎዛናፕ አዴይሳቲ፥ ያሳይ ታው ዎንጌላ ናጎ አሶ ኢሚዳይሳ ኤሪያ ጊሾ ሲቆን አዶሶና። 17 ሺን ታና ቃናቴይሳቲ ታ ቃሹዎ ቦላ ሃራ ሜቶ

ኤሃናባ ኤንታው ዳኒን ባንታና ዶሲዲ ኪሪስቶሳባ አዶሶናፕ አቲን ቱማ ዎዛናፕ አዶኮና።

18 ሄሲ አይኮካ ሜቴና። ቱማ እጌን ጊዲን ዎይኮ ዎርዶ እጌን ጊዲን ሄ ኡባን ኪሪስቶሲ ሳባኪቴስ። ታና ሄሲ ኡፋይሴስ። ቃሲ ሃራባይ ታና ኡፋይሴሲያባይ። 19 ታኒ ሂንቴ ዎሳኒኔ ዮሱስ ኪሪስቶሳ አያና ማዱዎን አታናይሳ ኤሪያ ጊሾ ታና ኡፋይሴስ። 20 ታ ጊታ አዎይኔ ኡፋይሳን ናጊያ ናጎይ ታ ዮላቶና አታናይሳ። ሺን ኡባ ዎይ አሴይሳዳ፣ ሃዲካ ታኒ ፓፃ ዴዲን ዎይኮ ሃይቂን ያዮና ታ ኩሚሳ አሳቴሳን ኪሪስቶሲ ቦንቼታና ጋዳ ሚናቴሳን አዳይስ። 21 ታ ዴዲኮካ ኪሪስቶሳ ፃላላስ ዴዳይስ፤ ቃሲ ታ ሃይቂኮካ ታው አዲዳ ዎዴ። 22 ሺን ታ ፓፃ ዴዲኮ አይፌይ ዴዲያ አሶ አሳና። ሺን ፓፃ ዴዳይሳፌኔ ሃይቆፕ አውሳ ዶራኔኮ ታው ኤሬቴና። 23 ታኒ ሃ ናምዓታፕ አውሳ ዶራኔኮ ኡንዴታስ። ሃ ዴዑዎፕ ሻኪታዳ ኪሪስቶሳራ ኢሲፌ ዳናው አዎታይስ፤ ኪሪስቶሳራ ኢሲፌ ዴዳይሲ ኡባፌ አዲዳ ሎዎ። 24 ሺን ታኒ ሂንቴ ጊሾ ፓፃ ዴዳይሲ ሂንቴው ዳሮ ኮሺያባ።

25 ሄሳ ታኒ ጊሻዳ ኡራይስ፤ ታኒ፣ ሂንቴ አማኖን ዲጫናዳኔ ኡፋይታናዳ ሂንቴራ ፓፃ ዳና። 26 ሄሳ ጊሾ፣ ታኒ ሂንቴኮ ሲማዳ ያ ዎይ ኪሪስቶስ ዮሱሳራ ሂንቴ ዴዲያ ዴዑዎን ታናን ዴዲያ ጩቁቴሳይ ሂንቴው ዳራና።

27 ኡባፌ አሲዲ፣ ሂንቴ ኪሪስቶሳ ዎንጌላስ ቦንቾ ኤሂያ ዴዎ ዴዲቴ። ታ ሂንቴና ቤዲን ዎይኮ ቤዎና ኢዳን ሂንቴ ኢሲ ቆፋን ሚኒዲ ኤቂዲ፣ ሃራቲ ዎንጌላን አማናና ሜላ ኢሲ ዎዛናን ጊዲዲ ኢሲፌ ባዴቴይሳ ታ ሲዳና። 28 ሂንቴ ዎርኪታስ ያዮሬቴ። ኤንቲ ሂንቴራ ኤቁቲያባ ጊዲኮ ሄሲ ሂንቴው አቶቴሳስ፣ ኤንታው ዳዮስ ያሳፌ ጊዲዳ ማላ። 29 ኪሪስቶሳስ አሲያ ቃዳይ ሂንቴው ኢሜቲዳይ፣ ሂንቴ ኢያ አማናና ሜላ ፃላላ ጊዶናሺን ሂንቴ ኢያ ጊሾ ሜቶ ኤካና ሜላሳ። 30 ሄሳ ጊሾ፣ ሂንቴ ታ ዎያ ካሴ ቤዲዴታ፤ ሃዲካ ታ ዎዩቴይሳ ሲዴታ። ሂንቴካ ታ ዎያ ሜላ ዎዩቴታ።

## 2

### ቱማ አሽኪቴሳ

1 ኪሪስቶሳን ሂንቴ ዴዲያ ዴዎይ ሂንቴና ሚንሴስ፤ ቃሲ ኢያ ሲቆይካ ሂንቴና ሚንሴሴስ። ጊሻ አያናራ ሂንቴው ኢሲፌቴሳ ዴዳስ፤ ሂንቴ ሃራታስ ከሄታኔ ቃዴቴታ። 2 ሂዛ፣ ሂንቴ ኢሲ ቆፋን፣ ሲቆን፣ ኢሲ ዎዛናኒኔ አያናን ኢሲያ ጊዲዲ ታና ፖሎ

ኡፋይሲቴ። 3 ሂንቴና ዶሶን ዎይኮ ጩቁቲያ ሃዳ አዋን ኢሲባካ አሶፊቴ። ሺን ሂንቴ ኢሶይ ኢሱዋፌ ጊታታይስ ያጊዲ ቆፖና ሂንቴና ካዉሺቴ። 4 ሂንቴ ኢሶይ ኢሶይ፥ ሃራ አሲ ማዲያባ ኮይቴፕ አቲን ሂንቴና ማዲያባ ፃላላ ኮዮፒቴ።

5 ኪሪስቶስ ዩሱሳን ዴዒያ ቆፋይ ሂንቴናን ዳናው ቤሴስ።

6 ኢያው ኡባ ዎዴ ዎሳ ሃኖቴሲ ዴዔስ።  
ያኒያ ጊሾ፥ ኢያ ዎሳራ ኢሲኖ አሲያ ሃኖታ፥  
ዎልቃን ኤካናው ኮይቤና።

7 ጊዶሺን፥ ኢ ባው ዴዒያ ቦንቹዋ ኡባ አጊዲ፥  
አይሌ ሜዴታ ኤኪስ፤  
አሴ ዳኒዲ ቆንጨስ።

8 ኢ ባና ካዉሺስ፤  
ሃይቃና ጋካናው፥  
ሃሪ አቶሺን ማስቃሊያ ቦላ  
ሃይቃናው ኪቴቲስ።

9 ሄሳ ጊሾ፥ ዎሳይ ኢያ ዳሮ ጶቁ ጶቁ አሲስ፤  
ቃሲ ሱንሳ ኡባፌካ አዲያ ጶቃ ሱንሳ ኢሚስ።

10 ሳሎኒኔ ሳዓን፥  
ሳዓፕ ጋርሳን ዴዒያ ኡባይ፥  
ዩሱሳ ሱንሳ ቦንቹዋስ ጉልባታና።

11 አሳ ኡባይ ባንታ ኢንፃርሳን፥  
ዩሱስ ኪሪስቶሳ ጎዳ ያጊዲ፥  
ዎሳ አዋ ቦንቹዋስ ማርካታና።

**ሃ አላሚያስ ፖዎ ጊዶ**

12 ታ ኢሻቶ፥ ታኒ ሂንቴራ ዴዒያ ዎዴ ኡባን ሂንቴ ኪቴቲዳይሳዳ፥ ሃዒ ታኒ ሂንቴ ማታፕ ሃኪንካ፥ ካሴይሳፌ አሲዲ፥ ኪቴታናው ቤሴስ። ዎሳስ ያሻኒኔ ኮኮርሳን ሂንቴ አቶቴሳ ፖላናው አሲቴ። 13 ዎሳይ፥ ሂንቴ ኢያው ኤሮ ጊዲ ኪቴታና ሜላ ኡባ ዎዴ ሂንቴ ጊዶን አሴስ።

14 አይ አሶ አሲሼካ ዙዙዋና ዎይኮ ፓላዋና አሲቴ። 15 ጌላኔ ናጋራንቾ አሳ ጊዶን ቦሬቶናይሳታ፥ ጌሻታኔ ፖኮይ ባይና ዎሳ ናይታ ጊዲቴ። ሂንቴ ኤንታ ጊዶን ሳሎ ዎሊንቶዳ ፖዒሼ፥

16 ዴዎ ኢሚያ ኪታ ኤንታው አዲቴ። ሄ ዎዴ ታ ዳቡሪሳይኔ ታ አሶይ ሜላ አቲቦና ጊሾ ኪሪስቶሲ ያ ጋላስ ታ ሂንቴናን ጩቁታና።

---

2:10 ኢሳ 45:23      2:15 ዛሬ 32:5

17 ሂንቴ ያሳስ ኢሚያ አማኖ ኢሞታ ቦላ ታ ሱሳይ ኡሻ ያርሾዳ \* ጉኪኮካ ታና ኡፋይሴስ። ሂንቴካ ታራ ኡፋይታና።  
 18 ሄሳዳ ሂንቴካ ኡፋይቲዲ ታናካ ኡፋይሳናው ቤሴስ።

**ዲሞቲዮሳኒ ኤጳፊራዲቱሳ**

19 ታኒ ሂንቴ ዴዑዋባ ሲዓዳ ኡፋይታናው ዲሞቲዮሳ ሂንቴኮ ኤሌሳዳ ዩዳና ሜላ ጎዳ ዩሱሲ ታና ማዳናይሳ አማኔታይስ።  
 20 ሂንቴ ዴዑዋስ ዎዛናፔ ቆፒያ ኢያ ሜላ አሲ ሃሪ ኦኒካ ባዋ።  
 21 ሃራቲ ባንታና ጎዲያባ ኮዮሶናፔ አቲን ዩሱስ ኪሪስቶሲ ኮያባ አሶኮና። 22 ኢ ታራ ኢሲፌ ጊዲዲ ናዲ ባ አዋስ አሴይሳዳ ዎንጌላ አሶ አሲዳይሳኔ አማኔቲያ አሲ ጊዴይሳ ሂንቴ ኤሬታ።  
 23 ሄሳ ጊሾ፣ ታባይ ሃኒያባ ቤዓዳ ኤሌሳዳ ኢያ ሂንቴኮ ዩዳና ጋዳ ቆፓይስ። 24 ታኒ፣ ታ ሁዔን ማታ ዎዴን ሂንቴኮ ባናይሳ ጎዳን አማኔታይስ።

25 ሄሳዳካ፣ ታኒ፣ ታ ኢሻ ኤጳፊራዲቱሳ፣ ታራ ኢሲፌ ታ ባጋ ጊዲዲ አሲዳይሳ፣ አሌቲዳይሳኔ፣ ታና ማዳናው ሂንቴው ኪቲቲዳይሳ፣ ሂንቴኮ ኪታናው ቆፓስ። 26 ኢ ሂንቴና ኡባ ቤዓናው ዳሮ ላሞቱስ። ቃሲ ኢ ሃርጌቲዳይሳ ሂንቴ ሲዲዳ ጊሾ ባ ዎዛናን ዳሮ ኡንዔቲስ። 27 ኢ ቱማ ሃርጌቲዲ ሃይቂ ኪቺዲ አቲስ። ሺን ያሳይ ኢያው ቃዴቲስ። ኢያ ሃላላስ ጊዶናሺን አዛኖይ አዛኖ ቦላ ጉገፍቶናዳ፣ ታዉካ ቃዴቲስ።

28 ሂዛ፣ ሂንቴ ኢያ ዛሪ ቤዲዲ ኡፋይታናዳ ታዉካ ታ ዎዛና ሴላይ ኢርዓናዳ ታኒ ኢያ ኤሌሳዳ ሂንቴኮ ዩዳናው አሞታይስ።  
 29 ጎዳስ ሃጋዚያ አሳዳ ኢያ ኩሜሳ ኡፋይሳን ሞኪቱ። ቃሲ ኢያ ሜላ አሳ ኡባካ ቦንቺቱ። 30 ሂንቴ ታ ማታን ጊዲዲ አሳናው ዳንዳያና ማዲያ ማዲዲ ኪሪስቶሳ አሱዋ ጊሾ ባ ሺምፑዋስ ሚሼቶና ኢዲዲ ሃይቂ ኪቺዲ አቲስ።

3

**ቱማ ዲሎቱሳ**

1 ዉርሴሳን፣ ታ ኢሻቶ፣ ሂንቴ ጎዳባ ጊዲያ ጊሾ ኡፋይቲቱ። ታኒ ካሴ ሃፊዳይሳ ዛራዳ ሃፋናይሲ ታና ዋይሴና፣ ሺን ሂንቴና ባላፔ ናጋና።  
 2 ኢታባ አሲያ ካናታፔ፣ ቃሲ ቃፃሬታናው ኮሼስ ጊያ ኢታ አሳታፔ ናጌቲቱ። 3 ኦኒ ያሳ ጌሻ አያናን ጎይኒያ ጊሾኔ ኑ ዴዑዋን

\* 2:17 ታ ሱሳይ ኡሻ ያርሾዳ፣ ኢሲ ኢሲ ዎዴ ያርሾ ቤሳን ያርሼቲያ ሜሄ ያርሹዋ ቦላ ሃሴ ዎይኮ ዎይኔ ኡሻይ ጉኪስ።

ኪሪስቶስ ዮሱሳን ጨቁቲያ ጊሾ ቴማ ቃፃሮ ቃፃሬቲዳይሳታ። ኑኒ ካሬ አሳቴሳ ቦላ አሴቲያባን ጨቁቶኮ።

4 ታ ካሬ አሳቴሳን ጨቁታናው ኮሺኮ ታ ዳሮባን ጨቁታናው ዳንዳዳይስ። አይ አሲካ ባ ካሬ አሳቴሳን ጨቁቲያባይ ባው ዴዔስ ጊዲ ቆፒኮ። ታኒ ኢያፕ ዳሮ አዳዳ ጨቁቲያባይ ዴዔስ። 5 ታኒ ዮሌቲዳ ሳሚንታራ ቃፃሬታስ። ታኒ ዮሌታን ኢስራዔል፤ ታኒ ቢኒያሜ ዛሬ፤ ታኒ ዋላኪ ባይና አይሁዴ አሴ። አይሁዴ ሂጌ ናጎን ጊዲኮ ታኒ ፋሪሳዌ። 6 አይሁዴ አማኑዋስ ሚጤቱሳን ጊዲኮ ታኒ ዎሳ ኬሳ ዮዴሳስ። ኢሲ አሲ ሂጌ ናጊዲ ጊሊያባ ጊዲኮ። ታናን ቦሬይ ቤንቲቤና።

7 ሺን ካሴ ታና ማዴስ ጋዳ ቆፒዳባ ኡባ። ኪሪስቶሳ ጊሾ ጋዳ ማዴናባ አሳዳ ታይባስ። 8 ሄሳ ፃላላ ጊዶናሺን ታኒ ታ ጎዳ ኪሪስቶስ ዮሱሳ ኤሬይሲ ሃራባ ኡባሬ ዳሮ አዲያ ጊሾ ሄ ኡባ ዎዴይ ባይናባዳ ታይባስ። ታኒ ኢያ ጊሾ ኡባባ ዳያስ። ኪሪስቶሳ ዴማናው ኡባባ ዎራ ሆሌቲዳ ቡሬዳ ታይባይስ። ታኒ ዮሱሳራ ኢሲያ ጊዳስ። 9 ታኒ ሂጊስ ኪቴታዳ ዴሚያ ታ ሁዔ ጊሎቴሲ ታው ባዋ። ኪሪስቶሳ አማኒን ቤንቲያ ጊሎቴሳይ። ዎሳ ማታፕ ያ ጊሎቴሳይ ሃኒ ታው ዴዔስ። 10 ታኒ ኪሪስቶሳኔ ኢያ ዴንዶ ዎልቃ ኤራናው ኮያይስ። ታኒ ኢያ ሜቱዋ ኢያራ ሻኪኮታናውኔ ኢያ ሃይቁዋን ኢያ ዳናናው አዋታይስ። 11 ሄሳዳካ። ሃይቆፕ ዴንዳዳ ሜሪናው ዴዎን ዳናይሳ ኡፋይሲ አሳይስ።

**ጋፃ ጋካናው ዎሂቴ**

12 ታኒ ሃኒ ጋፃ ጋካስ ዎይኮ ታናን ባሊ ባዋ ጊኬ። ሺን ኪሪስቶስ ዮሱሲ ታና አይኪዳ ጊሾ ታኒ ታ ሲንሳን ዴዒያ ዎይቱዋ አይካናው ዎፃይሲኔ ቡቴታይስ። 13 ታ ኢሻቶ። ታኒ ሄሳ ዴማስ ጋዳ ቆፒኬ። ሺን ታኒ ኢሲባ አሳይስ። ታፕ ጉዮራ ዴዔይሳ ዶጋዳ ሲንሳን ዴዔይሳ አይካናው ዛቱራይስ። 14 ሄሳ ጊሾ። ታኒ ጋፃ ጋካናው ዎፃይስ። ዎሳይ ኪሪስቶስ ዮሱሳ ባጋራ ሳሎ ዴዑዋስ ዪጊዳ ዎይቱዋ ኤካናው ዳቡራይስ።

15 ሂዛ። ኑኒ አያናን ጋሽቲዳ ኡባይ ሄሳ ቆፓናው ቤሴስ። ሂንቴሬ ባጋታስ ዱማቲያ ቆሬ ዴዒኮ። ሄሳካ ዎሳይ ሂንቴው ቆንጩሳና። 16 ጊዲኮካ። ኑኒ ሃኖ ጋካናው ዴዒዳ ዴዑዋን። አኔ ሲንሴ ቦስ።

17 ታ ኢሻቶ። ታና ዳኒቴ፤ ሄሳዳካ። ኑ ሌሚሱዋ ካሊያ አሳታ አኬኪዲ ቤዒቴ። 18 ታኒ ሄሳ ሂንቴው ካሴ ዳሮ ቶሆ አዳስ። ሺን ሃኒካ ዛራዳ አፋሳን አዳይስ። ኪሪስቶሲ

3:5 ሃ.አ 23:6፤ 26:5፤ ሮሜ 11:1    3:6 ሃ.አ 8:3፤ 22:4፤ 26:9-11    3:17 1ቆሮ 4:16፤ 11:1

ማስቃሊያ ቦላ ሃይቂዳይሳስ ባንታና ሞርኬ አሲዳ ዳሮ አሳቲ ዴቦሶና።<sup>19</sup> ኤንታ ዉርሴሳይ ዳዮ፤ ኤንታ ኡሎይ ኤንታው ያሴ። ዩላታናው ቤሲያባን ኤንቲ ጨቁቶሶና፤ ቃሲ ሃ ሳዓባ ዓላላ ቆፖሶና።<sup>20</sup> ኑ ቢታይ ሳሎዋና። ሳሎፕ ዩዲ ኑና አሻናው ዴዲያ ጎዳ ዩሱስ ኪሪስቶሳ ናጎስ።<sup>21</sup> ኪሪስቶሲ ኡባባ ባ ማታፕ ጋርሳን አላናው ዳንዳዲያ ባ ዎልቃን ኑ ዳቡራንቾ አሳቴላ ሳሚዲ ባ ቦንቾ አሳቴላ ዳኒሳና።

4

**ዉርሴሳ ዞሬ**

1 ታ ኢሻቶ፥ ታ ዶሴይሳቶ፥ ታ ላሞቴይሳቶ፥ ታና ኡፋይሴይሳቶ፥ ታና ጊታዩይሳቶ ሂዛ ጎዳን ሚኒዲ ኤቂቴ።

2 ኤዎዲኔ ሲንፃካ፥ ሂንቴ ናምዓይ፥ ኢሲ ቆፋን ሚቺዳ ጎዳን ዳናዳ ታኒ ሂንቴና ዞራይስ።<sup>3</sup> ታራ አሲያ አማንጴይሶ፥ ኔኒ ሃ ማጫሳታ ማዳና ሜላ ታ ኔና ዎሳይስ። ሃ ማጫሳቲ ታራ፥ ቁሌሚንዎሳራኔ ኤንታ ሱንሳይ ያሳ ዴዎ ማፃፋን ዓፌቲዳ ሃራታራ ኢሲፌ ዎንጌላ ኡባ ቤሳ ጋላናው ዳቡራይሶና።

4 ጎዳራ ሂንቴ ዴዲያ ዴዑዎን ኡባ ዎዴ ኡፋይቲቴ። ታኒ ሄሳ ጉጃዳካ አዳይስ፤ ኡፋይቲቴ።

5 አሳ ኡባይ ሂንቴ አሽኬቴላ ኤሮ፤ ጎዳይ ማታን ያና።<sup>6</sup> ያሳ ሂንቴ ዎሲያ ዎዴ ኡባን ኢያ ጋላቲሼ፥ ሂንቴና ኮሺያባ ኡባስ ዎሲቴፕ አቲን አይቢባስካ ሂርጎሬቴ።<sup>7</sup> አሳ ኤራቴላ ኡባፌ አዲያ ያሳ ሳሮቴላይ፥ ሂንቴ ዎዛናኔ ሂንቴ ቆፋ ጎዳ ዩሱስ ኪሪስቶሳ ባጋራ ናጋና።

8 ዉርሴሳን፥ ታ ኢሻቶ፥ ሂንቴ ዎዛናን ሎዎባኔ ጋላቲሲያባ ቆፒቴ። ቴማ ጊዲያባ ኡባ፥ ቦንቾባ ኡባ፥ ቆዎ ጊዶናባ ኡባ፥ ጌሻባ ኡባ፥ ሲቆባ ኡባኔ ኡፋይሴይሳባ ኡባ ቆፒቴ።<sup>9</sup> ሂንቴ ታፕ ታማሪዳባ፥ ኤኪዳባ፥ ሲዲዳባኔ ቤዲዳባ ኡባ አሲቴ። ሳሮቴላ ኢሚያ ያሳይ ሂንቴራ ኢሲፌ ጊዳና።

**ጳዉሎሲ ኢሜቲዳ ኢሞታስ ጋላቲስ**

10 ዳሮ ዎዴፕ ጉዩ፥ ሂንቴ ታባ ዛሪዲ ቆፓናው ዶሚዳ ጊሾ ታኒ ጎዳን ዳሮ ኡፋይታይስ። ሄሳ ጉሳይ፥ ታው ቆፓናው ሂንቴው ኢንጂቶና ኢዲዳይሳፌ አቲን ታው ቆፋ አጊቤኬታ።<sup>11</sup> ታኒ ሄሳ ታና ሜቲዳ ጊሾ ጊኬ፤ ታው ዴዲያባይ ጊዳና ጉሱ ታማራስ።<sup>12</sup> ታኒ ሜቶቴቲዲ ዴዲያ ዱሲ ኤራይስ፤ ቃሲ ዱሬቲዲ ዴዲያ ዱሲካ ኤራይስ። አዉን ጊዲን ቃሲ አይ ዎዴካ ታኒ ካሎኔ ኮሻ፥ ፓጩኔ ፓላሃ ታማራስ።<sup>13</sup> ኪሪስቶሲ ታው ኢሚያ ዎልቃን ኡባባ አላናው ዳንዳዳይስ።

14 ጊዲኮካ፥ ሂንቴ ታ ሜቱዋ ታራ ኤኪዳይሳን ሎዎ አሲዴታ።  
 15 ፊልጲሲዩሳ አሳው፥ ዎንጌላ ኮይሮ አዳናው ታኒ ማቄዶኒያ፤  
 ኬያ ዎዴ ኢሚያባንካ ኤኪያባንካ ሂንቴ ዎሳ ኬሳፌ አቲን ሃሪ  
 ታና ማዲቦናይሳ ሂንቴ ኤሬታ። 16 ቴሴሎንቄን ሜቶይ ጋኪዳ  
 ዎዴካ ታና ዛሪ ዛሪዲ ማዲዴታ። 17 ታኒ፥ ሂንቴፌ ኢሞታ  
 ኤካናው ኮያዳ ጊዶናሺን ኢሞፕ ያ አንጁዋ ሂንቴ ኤካና ሜላሳ።  
 18 ታኒ፥ ሂንቴ ኢሚዳ ኡባኔ ጊዲዲ ፓላሄይሳ ኤካስ። ሂንቴ  
 ዩዲዳ ኡባ ኤጲፊራዲቱሳፕ ኤካስ፤ ኮሺያባ ኡባይ ታው ዴዔስ።  
 ሂንቴ ታው ዩዲዳ ኢሞይ ያሳስ ሳዎ ቶንጉ ጊያ፥ ኢ ዶሲያ፥  
 ኢ ኡፋይቲያ ያሮሾ ሜላ። 19 ታ ያሳይ ባ ቦንቾ ዱሬቴሳፌ፥  
 ኪሪስቶስ ዩሱሳ ባጋራ ሂንቴው ኮሺያባ ኡባ ኢማና። 20 ኑ አዋ  
 ያሳስ ሜሪናፕ ሜሪና ጋካናው ቦንቾይ ጊዶ። አሚንዒ።

**ዉርሴሳ ሳሮታ**

21 ኪሪስቶስ ዩሱሳ ባጋራ ያሳባ ጊዲዳ ኡባ ሳሮ ጊቴ። ታራ  
 ዴዒያ ኢሻቲ ሂንቴና ሳሮ ኅሶና። 22 ያሳባ ጊዲዳ አሳ ኡባይ፥  
 ኡባፌ አሲዲ ካዉዋ ቄሳሬ ኬሳን ዴዔይሳቲ ሂንቴና ሳሮ ኅሶና።  
 23 ኅዳ ዩሱስ ኪሪስቶሳ አዶ ኬሃቴሳይ ሂንቴራ ጊዶ።



አራሳ ጫቁዋ ጎፋሉ  
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

### Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

